

Polo Timotimpot Manénkir Kumwimp Pas **Mekia Akwapnámp Kar**

Jisas pok tenánko, 33 yopwar niamp arake fek,
Polo mámá pas Timotimpot kumwia sánkámon.

Timoti te provins Galesia mekamp taun Listra meknámp koropnámp arop tár-ménkino. Maomp naropwar te Griek fi, tá maomp éntupwar te Juda fi mekampono. Wokwaek Polo Kwapwe Kare Kar farákápámp fek Timotin warámpea yárakimpan maok, wakmwaek te Timoti Efesus mekamp sios taokeyak nánko, Polo má pas kumwia sámp-kérépámon. Timoti te ankár arop ankwap fárakapao Kristen fákáreramp mér kwatae papantá ‘Fwapi taokeyakria Kwaromp ninikaok mwanap’rá sénámon. Tá ankwap tokwae kar ankank te, ‘Timoti ankár am mekamp sios mek tére mwanap yae-párák kare arop yoroi papamp’rá sénámon. Tá Timotin kor ‘Ankár Jisasomp térenap arop kwapwe kare yakamp’rá sénámon.

¹ Ono Pol, Timoti amonapok kar kérép rae. Kwar ntiaka Krais Jisaso onan wokwaek kar akwapea kar farákápaeria aposel e papeaka onan sámp-kérépepon. Am Kwar te nomwan warko érékápámp Kwarono. Am Krais Jisas te nomo man nke mwanámpria yépékrá yakáp námon. [◊]
² Timoti e, ono Kwaromp kar farákáp nanko, amo

[◊] **1:1:** Kl 1:27

wawiaka ankár mántwaok akwap napantá, amo te ankár onokump táráp kare niamponoriaka ono waráp por má pas má kumwi nampon. Ono ninik namp te, Naropwar Kwar ntiaka nomp Tokwae Kar Krais Jisas mao námokuráp ninik fek amwan ninikia aropompiaka, yonkxae porokwe sánk keponoria nampon. [◊]

Nomo kwekár karan ankár apárok anámpá pap mwanámp kar

³ Ono wokwaek kar provins Masedonia mek akwap naeriaka amwan sériampnámp taknámp warko sér rae: Amo ankár taun tokwae Efesus mek am mek saráp yakria maok, Kwaromp kar yiki mwaek yénkrá farákáp konap arop ankwap fárakapan ‘Kwekár kar arop fárakapan farákáp kwapon. Pwar kip’rá kárakáre fek sérampo. ⁴ Tá am kwekár tisan arakrá sérampo: “Yumo yiráp tékénouamp e kouroumpea am fek nkawake make kíkír kar mwar táman ninik tokwaerá farákáp kwapon.” Am take kar te náráp ninik fárámp nánko, épérépnámp kar sérarrá tárápar mwanape. Am take ninik te Kwaro ponankor aropan ninikia yaewour naenámp ninik tokwae kwapweran yaewour mo karono. Nomo fwap am Kwaromp ninikan ninikia karenoria mér mwanámp. [◊]

⁵ Aeno ono oukoumwan amwan sánknamp kar máte nomwan arakrá yaewour naenámpria nampon: Nomo Jisasén kor kare karonoriaka mér kareria, Kwaro nke námp fek yiki kare yakáprá, tá nomo nomp ninik mek yurukupia kwatae ninik yakantá karrá yakáp mwanámp. Am

[◊] 1:2: Ap 16:1-3 [◊] 1:4: 1 Ti 4:7

ninik fek táman nomo nonopok nounouroup kare mwanámpón. ⁶ Arop ankwap fárakap te am ninik kour pwarará paokopria maok, kwaporok kar mwar táman sérarrá paokopriaka épépétrépi yakáp napon. ⁷ Am fárakapao Yino te Kwaromp lo mérnámp tisa yakáp mwar'rá sér i konapon. Aenapao maok, námoku karerao kor am kar fwapia mér moria maok, téte am kar fian kor taknámp fwapia mér mo napon. ⁸

⁸ Nomo ponankor wae méron, am Mosesomp lo Kwaro arakrá térenkrianámpaoq tére námp te, am lo te kwawé kare ankankono. ⁹ Aeno nomo am táman kor fwapia mér námpón: Loamp tére te arop yae-párák námpán fákap mono. Arop lo kar ták-sir konap arop, sokoro ninikaok i konap, Kwarén kor younkwe sánkria maok, kwatae ninikaok tukupnap aropán fákap konámpón. Aeria maok, arop fárakapao Kwaromp ninik te wampwenoriaka pwarará maok, apárokamp ninikaok tukup konap aropán fákap konámpón. Aeria maok, loamp tére te éntupwar naropwarén kor tirá wouria, arop ankwapan kor tirá wourinap aropán fákapá pap konámpón. ¹⁰ Aeria maok, koumteouráp arop kokoporria maok, poumou-tárápu nonopok yupunámp kokoporria maok, arop arop oukun érékpria maok, arop ankwap fárakap kwekár i konap, ankwap fárakap te kwekárria maok, karenoriaka, fou e sér i konap, tá Kristen ninikan yénképnámp téreran yorowar i konap ankwap-ankwap ninik ponankor, am taknap arop fárakap táman loao fápákamánk i

⁸ 1:7: 1 Ti 6:3-4

konámpono. **11** Má kar kare máte Kwaro onan farákápampria sápnámp Kwapwe Kare Kar mek yak námpón. Am Kwaronámpoknámp koropnámp Kwapwe Kare Kar te waeráp kwapwe ara, nomo ponankor man warákár mwaro.

Polo Kwaro nomwan manénkir aropompimpan 'Aesio'rá sérimp kar

12 Nomp Krais Jisas Tokwae Karao ono fwap maomp karwaok tére nanamp nkea méria maok, onan nánapia náráp tére téreaeria kárakáre sáp námpón. Aerianánko maok, ono man 'Aesio'rá sér rae. **13** Kare, ono wokwaek kar te Kwaromp e wourouumprá yárakria maok, Kristen fákáreran sokororia man kárakárerá yárakiápon. Aeno mao wae mér, ono oukoumwan Kraisén kare karonorá mér moriaka épérép nínik fek man yopor nampara, mao onan aropompi námpón. **14** Aeria maok, nomp Kwar Tokwaerao námoku nínikia onan warákár tokwae námpón. Aenánko, ono am warákár tokwae fek Kraisént koumpeyakápnámp aropamp man mér námp, tá nomp ankwapnápéén nouroupnámp nínik sámpampono.

15 Krais Jisas te apárok ékia maok, kwatae níníkráp arop nomwan érékép naeria ék námpón. Mámá kar fi te kare karara, arop ponankor kare karonorá méranápono. Táte onoku kareao kor arop ponankor kámá-pwarará kwatae kare níníkráp arop nampono. **16** Aeno Krais Jisaso nínik námp te, arop ponankor mao kwatae níníkráp aropan aropompria porokwe fek yépek i

◊ **1:12:** Ap 9:15 ◊ **1:13:** 1 Ko 15:9-10 ◊ **1:15:** Lu 19:10

konámpan mérenkria námpón. Aenámpara, ono arop ponankor kámá-pwararea kwatae kare nampán maok, mao onanmékir aropompi námp te, arop ponankor onan nkea, am fárakapao kor karenori-aka man méria maok, yiki yaká yakáp mwanap sámp mwanapon. ¹⁷ Mao te ankár yaká yak konámp kingono. Mao te sumpwi mo i konámp, arop man te nke mo, mao te Kwar ankárakre kare támáono. Nomo ponankor mao te tokwae kar kárakáre kor kwapwe kareara, maomp e kumur méntép ankár sámp ea sakap mwaro.

Timoti ankár Satanén yorowaria kwe-pwar naenámp kar

¹⁸ Onomp táráp Timoti, ono siosomp profet fákárerao wokwaek amwan sériap karan ninikia, oukoumwan amwan amo térenanap karan sénae rae: Amo am profet kar támán warko ninik napo maok, amwan kárakáre sánk nánko, amo ankár soldia niamp kárakáre fek fokopeyakria Satanén yorowaria kwe-pwarampo. ¹⁹ Am yorowarnámp mek amo Kwarén mér napan kárakáre fek sámp-fákeyakria, Kwaro nke namp fek waráp ninik mek kwatae ninik yak mo kare námprá ankár mérampo. Arop ankwap fárakap tak mo, kwatae ninik yak nánko, Kwaro man fwapokwap naenámpán monorá napo maok, náráp Kwarén mér nap ankár kwatae akwap námpón. ²⁰ Himeneus ntiaka Aleksander arop yaworao kor takepo, ono Satanomp yaek sánk nanko maok, Satano am arop yaworan

[◇] **1:18:** 1 Ti 4:14

sámpá sokoro nánko, warko níníkiaka Kwarén wourouump mo nenepon. ☩

2

Kwarén kar toropwap i konap ninik

¹ Aeno am tére amwan téreampori namp te, manénkír sénaenamp kar te aráne: Ponankor koumteouráp aropan arakrá sérampo: “Yumo ankár arop ponankoran níníka Kwarén man aropompria yaewouramporia kar toropwapria mao tak naenámp ‘Aesio’rá sér kipo.” ² Aeria maok, Kwarén ‘King ntiaka gavman fákáreran kor yaewourampo’rá sénapo, nomo ponankor yonkwae porokwe fek yakápria maok, tá nomo ankár Kwaro warákárnámp níníkaok paokop mwanámp. ³ Am ponankor aropampor Kwarén sénap kar te kwapwe námpara, nomwan warko éréképeanámp Kwar te wawiaka warákár i konámp. ⁴ Maomp níník te ankár arop ponankor warko éréképeanánko, am Kwaromp níníkamp kar ponankor te karenoria mér mwanapria námpon. ☩ ⁵ Nomo te wae mér námpon, Kwar te ankáránk karerao yak námpon. Aenánko maok, arop ankáránkamp kuk yakria Kwaronámp mwaek yak, arop nomonámp mwaek yak. Aenámp arop te Krais Jisasono. ⁶ Kwaro sérimp yae fek Krais námoku karerao arop ponankor warko yamokwapea érékép nanampria sumpwimpon. Am takimp níník Kwaro nomwan yénkép námp te, maomp níník te arop ponankor warko érékép nanampria nimpon. ⁷ Aeriaka Kwaro onan

✩ 1:20: 1 Ko 5:5 ✩ 2:4: 2 Pi 3:8-9

aposel yakaeria arop ankwap firaonapok sámp-kérépámpon. Aeránko maok, ono am Kwapwe Kare Kar érik farákápria, Kwarén mér mwanap kare yénk nampon. Ono te kare sénampon, ono te kwekár mo karenon. [◊]

⁸ Aeria maok, onomp nínik te, sios ponankor mek arop fákárean yumo kar toropwap nap te, yopor yonkwae, yopor kar sér i konap te ankár pwararea, yiráp nínik yiki kare yakria, yumoku Kwarén sánkria, kar toropwap kipria nampon.

'Yaewour i konap tére te koumteouamp yae-párák kare moporono'rá sénámp kar

⁹ Tá onomp nínik te koumteou te man pwinámp waempyaman yirir kipo. Náráp me pwae, náráp pourouk kápae kare mopor ntia mani tokwae fekamp waempyam yirírantáno. [◊]

¹⁰ Aeno 'Námo te Kristen nono'rá sér i konap koumteou fákáreramp yae-párák kare mopor te ankár nkawakwe make yaewour i konap tére nap támaono. [◊] ¹¹ Koumteou te námoku ankár sámp-anámprá, karmparáp tankria Kwaromp karan sámp mwanapon. ¹² Onomp nínik te, koumteourao lotu nap mek poumou-tárápuran poukeyakrá Kwaromp kar yénk te mono ri konampon. Lotu mek koumteou te párák tankrá wa mwanapon. ¹³ Am te arakrianono: Kwaro Adaménénkir yoroia maok, wakmwaek Ivén yoroi námpara. [◊] ¹⁴ Aempan maok, Adam te kwekár karan karenorá moimpon. Yupurao maok kwekár karan karean mpweria kwatae níníkimpon.

[◊] **2:7:** Ap 9:15 [◊] **2:9:** 1 Pi 3:3-4 [◊] **2:10:** 1 Ti 5:10 [◊] **2:13:**
Stt 2:7,22

◊ 15 Aeno koumteourao Kwarén mérrá yakria maok, tá náráp Kristen ankwapyaenápén nounouroupria, tá yiki kor ninik fek yae-párák kare ninik fek yakáp napo, tárápu tankápnap ke fek Kwaro man yaewour naenámpo.

3

Sios taokeyakáp konap arop fárákapamp kar

¹ Mámá kar te kare karono: Arop sios taokeyak naenámp arop yak naerianámp te, am arop te kwapwe kare tére naeria warákár námpo. ² Aeria maok, taokeyak konámp aropao kor yae-párák kare yak nánko maok, arop fákárerao kor mao nkvak mak námp nke mo, tá mao te ankárankamp yupuráp arop yak nae-námpo. Aeria maok, ninik kour fek yae-párák yárakria maok, ankár námoku poukwap kour kwapwe kareria, ankár yae-párák ninikaok saráp yárak naenámpo. Aeria maok, arop ponankor nounouroupria maok, Kwaromp kar yae-párák yénk konámp arop yak naenámpo. ³ Mao te bia fária mánmán naeane. Mao te koupour yonkuae pwarámp naeane, mono. Arop sánánkar porokwe fek kun. Tá mani ankankantá ninik tokwae naeane. ⁴ Mao te náráp séraroan fwapnae karia taokeyakria maok, náráp tárapuran fwapokwap nánko, maomp karwaok tukup mwanapon. ⁵ Am te apaeriaka, arop náráp séraroan fwapia poukeyak mo námp te, mao te Kwaromp siosén kor mokopia taokeyak naenámpanápe. ◊ ⁶ Oukoumwan kar Kristeni námp te arop taokeyak te mono. Mao te am tére fek, ono

◊ 2:14: Stt 3:6 ◊ 3:5: Ta 1:6-9

te tokwae karonorá ninik nánko, Kwaro wokwaek Satanén kotimpnámp taknámp naeane. ⁷ Am arop kwapwe kare yárak nánko maok, Kwaréen mér monap aropao man nkea, ‘Mao te kwapwe kare aropono’rá sénapo maok, mao fwap sios arop taokeyak naenámpón. Aeno mao kwapwe kare yárak mo námp te, sérarapo, pwarápae nánko, Satano man fákapá pap naeane. ⁸

Sios mek tére konap aropamp kar

⁸ Taknámp sios mek tére konap arop fárakap arop nke nap fek yae-párák kare ninik fek tére mwanapon. Takria am arop fárakap anánkaopwe niníkráp arop yakáp mwanape. Tá bia tokwae fária mánmán mwanape. Maniráp ankankan kikiank mwanape. ⁹ Am fárakap ankár náráp ninik mek Kwaro nke námp fek kwatae ninik yak mo námp mérria, Kwaro nomo man mérnámp arop nomwan yénképnámp kar kareran ankár kárákáre fek mérrá yakáp mwanapono. ¹⁰ Manénkir te amo man téreae ritea mokopon nkea maok, tére yae-párák nánko te, man ‘Amo fwap sios mek téreae’rá sérampo. ¹¹ Sios mek tére konap koumteouao kor námoku tére mwanap fwapnae karia niníkrá tére mwanapon. Kánánkámp sérari kwapon. Mao te ankár kwapwe kare ninik fek yakápriá maok, kwekár ninik ntia kokwae ninik yak mo, ankár yae-párák kare tére mwanapon. ¹² Sios mek tére konap arop te ankárrankamp yupuráp arop yakria, náráp séraroan fwapi taokeyakáp mwanapon. ¹³ Arop sios mek tére nap yae-párák kare tére napo te, man nkeaka ‘Mao te yae-párák

⁸ 3:7: 2 Ko 8:21 ⁸ 3:11: Ta 2:3

kare aropono'rá sér mwanapon. Aenapara, am aropao kor Krais Jisasomp Kwapwe Kare Kar fwap tae fek farákáp mwanapon.

'Kwaromp ninik fi kor te tokwae kar ankankono'rá sénámp kar'

¹⁴ Kare, ono amonapok wae koupour korop naenampao maok, warko oukoumwan ono má kar má waráp por kumwi nampono. ¹⁵ Aenampara, ono koupour korop mo nanko te, amo mámá kar man nkea Kwaromp firáp arop fárakapao yae-párák kare yakáp i konap ninik mérampo. Kwaromp firáp yakáp nap te yiki yaká yak konámp Kwaromp siosono. Am sios te oumpwarao nap sámp-fákeyak námp niamp, Kwaromp kar kare sámp-fákeyakea taokeyak konámpono. ¹⁶ Karenono, Kwaro námoku i konámp ninik fi kare yénkép námp te, am te tokwae kar ankankono:

Mao te arop kare arákarea, érik koropámpón.

Aenámpao maok,

Yiki Kor Spiritao nomwan yénkép námp te, mao te Kwaromp yae-párák kare Táráp karenono. Ensel fákárerao kor man nkeapon.

Aropao maomp kar farákáp napo te, arop fi ponankor wa napon.

Aenapara, apár ponankor mekamp aropao kor man karenoria mér napon.

Kwaro man yámar mek warámpea pokria e tokwae sánko yak námpón. [◊]

4

Aropamp ninik mek épérépi papnámp kar

[◊] **3:16:** Jo 1:14; Mk 16:19

¹ Yiki Kor Spiritao érik arakrá sénámpón: Nánkár wakmwaek ankwap ke fek arop ankwap fárakáp Kwarén mér nap pwateaka Satanomp kwekár i konap kwatae spirit yénk i konap karan woupwi pátea wawia ampaok mwarea napon. ^{◊ 2} Kwekár i konap arop fárakáp te kwekár ninikan sámpá paokopria maok, am kwekár karan sér saráp yakáp napara, am kar támao am fárakapamp ninik mek top-pwarámpeyak nánko, náráp kwatae ninik yak námp warko ninikia mér mo i konapon. ^{◊ 3} Aeria maok, am arop fárakapao 'Yupu sámp kwapono'rá sér, tá nkawakwe make firan 'Arop fári kwapono'rá sér i konapon. Aeno mao 'Wurienk'rá sénap ankank te Kwaro yoroimp ankankara, nomo Kwarén méria maomp kar kareran kor mér námp kwamp te, fwapon, Kwarén aesioriaka sámpia fár mwanámpón. ^{◊ 4} Nomo te wae méron, ankank ponankor Kwaro yoroimp te, kwapwe kare mwarono. Nomo monorá mwareano. Fwapon, nomo sámpria maok, Kwarén kar toropwaprá 'Aesio'rá séria sámp mwanámpón. ^{◊ 5} Kwaromp kar ntiaka nomo Kwarén kar sénámp te am fir fwapokwapiánánko, Kwaro nke námp fek kwapwe kare konámpón.

*Timoti ankár Kraisomp kwapwe kare tére arop
yak naenámp kar*

⁶ Amo má kar má kémpiyae tárápuran farákáp saráp yakria te, amo te Krais Jisasomp tére arop kwapwe yak nanapon. Amo wokwaek sámpap kar

^{◊ 4:1:} 2 Ti 3:1 ^{◊ 4:2:} 2 Pi 3:3; 1 Jo 2:18 ^{◊ 4:3:} Stt 9:3; Ro 14:6

^{◊ 4:4:} Stt 1:31; Ap 10:15

kwapwe Kristen mér i konap níniként tapokwa-peaka ankár sámpá yárakria te, am fek kárákáre tokwae sámp nanapon. ⁷ Aeno ankwap fárákapao Kwarén younkwe sánk konap épérép kar mwar farákáp nap te, amo ankár amwar yakria, Kwaro i konámp nínikaok tére kárákáreampo. ⁸ Amo te wae mér napon, pourou poukwap konap asa-sais te nomp pourou fwap yakano ritea nomwan fwap tae morok yaewour i konámpono. Aeno Kwaro i konámp nínikaok tukup námp te, am támao nomwan kápae kare ankank fek yaewouri-aka oukoumwan yiki yakáp námp fek, tá nánkár wakmwaek yaká yakáp mwanámpan kor yae-wour i konámpon. ⁹ Mámá kar fi te kare karara, arop ponankor kare karonorá mér mwanapono. ¹⁰ Nomo yiki yak konámp Kwarén yépékrá yakáp námpo. Mao te arop ponankoran warko érékép nae yonkwae námp te, nomo man mériaka 'Karenorá' sénámp arop nomwan kor kare kar warko érékép konámpon. Nomo am mér námpara, nomo térerá kárákárerá tukup konámpono.

¹¹ Amo te ono farákápnamp kar man koumteouráp aropan méranáponoria yénkrá farákápampo. ¹² Am fárákap amwan nke nap te, tár-ménki tae morok napan maok, takria amwan te kwaporok yaknap aropan mpwe mwanape. Amo am fárákap amonapaokanáponoria, amo kar sénap, amo yárak nap, amo arop ankwapan nouroup nanap nínik, amo Kwarén mér nap, Kwaro nke námp fek yiki kukur yaknap nínik, aran ampaok mwanapon. ¹³ Amo oukoumwan

⁷ 4:7: 1 Ti 6:20 ⁸ 4:9: 1 Ti 1:15

onan yépékrá yaknap ke fek te Kwaromp Buk fekamp kar arop wa nap fek nkerá farákápria maok, kar fi kor érik farákápria, Kristen i konap nínikan yénkrá farákápamo. ¹⁴ Sios taokeyakáp konap arop fákárerao waráp pourouk yae pap, tá arop fárakapao amo tére nanapan profet kar farákápapo, Yiki Kor Spiritao amwan ourour sánkámpan ník mo nanape. ¹⁵ Amo ankár am tére fwapia taokeyakria maok, amo ankár takrá térerá yak napo, arop ponankor waráp tére am nke napo, yae-párák kare naenámpo. ¹⁶ Amoku waráp nínik ntia aropan yénkrá farákápnap tére fwapia taokeyakampo. Amo kárákáre fek takrá yak napo maok, waráp waemp, tá waráp kar wanap aropamp waempao kor fwapi yak naenámpo.

5

Timoti sios koumteouráp aropan naenámp kar

¹ Amo mér aropamp nínikan fwapokwap naeria te, yopori kwapon. Waráp naropwarén sánánkar porokwe fek sér i konapnámp taknámpampo. Arop tár-ménkiran kor waráp nánae tár-ménkiran i konapnámp taknámpampo. ² Amo mérnámp yupuran te amokuráp éntupwarén i konapnámp taknámpampo. Yupu-táráp énkiran kor waráp antápan sér i konapnámp taknámpria maok, waráp nínik te ankár yae-párák kare fekampo.

Kae koumteouramp kar

³ Kae yupu námoku nápar yak nánko, man yaewour naenámp nouroup yak mo nánko te, amo

[◇] **4:14:** 2 Ti 1:6; Ap 8:17 [◇] **5:1:** Wkp 19:32

man yae-párák yaewourampo. ⁴ Aeno kae yupu wae maomp táráp yak námp, tá kupwináp yak námp, amo am fárakapan yénk napo, am fárakap náráp Kristen tére tokwae te am éntupwarén fwapia wunanápono. Náráp fi taokeyakáp mwanámp tamaonorá mér mwanapono. Takria maok, éntupwar naropwar wokwaek tére tokwae fek man wunep ponankoran nopok mwanapon. Karenono, Kwar te mámake pourouráp ninik taman warákár konápon.

⁵ Aeno kae yupu námoku nápar yak námp te, am yupu te ankár Kwarén mérrá yakria maok, yámarao, kumuruk kor Kwarén wumwirá, ‘Námwan yaewourae’rá kar toropwap saráp yak naenámpono. ⁶ Aeno kae yupu pouroukamp ninikaok saráp yárap námp te, mao te yiki yak námpao maok, wae sumpwi yak námp niamp námpo. ⁷ Aenámpara, amo te kae koumteouan má kar má farákápampo. Aenapo maok, am fárakap te nkawak mo mak mo, yae-párák kare yakáp napo, arop man kar sér mo mwanapono. ⁸ Arop námoku fi taokeyak moriaka, námokuráp séraroan kor fwapia taokeyak mo námp te, mao Kwarén mér námpan wae pwararea Kwarén mér monámp aropan kámákarea kwatae kare námpo.

⁹ Kae koumteouamp e buk fek kukumwi nap kwamp te, 60 yopwari yak námp, arop ankárrankampamp nap mek tankeanámp yupuramp eran saráp kumwiampo. ¹⁰ Am e kumwiria te, sios arop ponankorao nke nap fek kwapwe kare yaewour i konámp yupu yakano. Arakano: Mao náráp tárápuan kwapwe kare ninikan yénkrá, yae-

párák kare taokeyak. Tá ankwap némpouknámp aropan warákárria koropenkria wun i konámp. Tá námoku anámpea Kristen fákáreran yaewouria maok, nínik kápae yaknámp aropan kor yaewour i konámp. Aeria maok, am nkawake make tére yaewour kwapwe konámp yupuramp eran saráp kumwiampo. ☲

11 Kae koumteou oukoumwan énki yakáp napamp e kumwi kwapon. Am te apaeria, 'Kwaromp tére ankár tére nae'rá sénámpao maok, arop ankapan nkeaka kikiancia, maomp nap mek tank naerá nínik tokwaeria, Kraisén younkwe sánk mwanape. **12** Takria námoku sérinámp kar warko pwar nánko te, Kwaro man touwe sánk naeane. **13** Aeria maok, ankwap nínik te arak i konapono: Kokwae tákárrá nap-nap paokop i konapono. Am fárákap te kokwae tákár mwar mono, ankwap fárákapao kar sérar nap wa mwar karrá paokoprá wawi ko, kánánkámp arop younkwe mwaek sérarrá paokop i konapon. Takria maok, nomo tak mo mwanámp kar kwatae sérar i konapon. ☲ **14** Tak napantá maok, onomp nínik te, kae koumteou oukoumwan énki yakáp nap te warko poumou nap mek tankápria tárápu tiria maok, nap taokeyakáp napo maok, Kwarén mér monap arop nomwan wouroump mo mwanapon. ☲ **15** Amo te wae mér napon, kae koumteou ankwap fárákap Kwarén mér nap pwatea warko Satanomp wakmwaek paokop napon. **16** Aeno Kristen arop náráp firáp mekamp kae koumteou yakáp napo te, am Kristen arop

☞ **5:10:** Hi 13:2 ☲ **5:13:** 2 Te 3:11 ☲ **5:14:** 1 Ko 7:9

námoku éréképea taokeyak nánko te, sios te man taokeyak naenámp ninik kápae sámp mono. Kae koumteou nápar kar yakáp napan maok, sios man yaewour naenámpón.

Arop taokeyakáp konap aropamp kar

¹⁷ Yumwan taokeyakáp konap arop, yumwan yae-párák kare taokeyakáp nap te, nopal sámp konap mani narek yakano. Am mani tokwae sámp mwanap arop te Kwaromp kar farákáp konap, tá am ninik Kwaro warákár námpán yénk i konap kárakáre fek tére konap aropono. ¹⁸ Nomo te wae mér námpón, Kwaromp Buk fekamp karao arakrá sérrá, “Bulmakau wit pumpurékamprá yípi kwarámprá akwap námp fek te, man top-kump yirímp kwapono.” Tá “Tére arop te fwap mani sámp naenámpóno.” ¹⁹ Arop ankárakao ‘Arop taokeyak konámp arop máte sokoro námp’ ria sénánko, amo te maomp kar te wawi kwapono. Anánk, yinink arakerao sénapo maok, am táman wawampo. ²⁰ Am arop taokeyakáp konap arop ankwap sokoro napo, amo man fwapokwap naeria te, arop taokeyakáp konap arop ponankor éréképá tankrá fwapokwap napo maok, am fárakapao kor nkeaka apáp mwanapon. ²¹

Timoti námokuráp ninik fwapia taokeyak naenámp kar

²¹ Kwaro nke námp fek, tá Krais Jisaso nke námp fek, tá Kwaromp ensel fákárerao nke nap fek, ono amwan waeman kare kar sér rae: Amo fwapia am ono yénknamp loaok téreria maok,

[◇] 5:18: 1 Ko 9:9-11 [◇] 5:20: Ef 5:11

amo ankárankamp nínik fek arop ponankoran fwapokwapampo. Amo arop tokwae ntia waráp nouroupén saráp porokwe fekria, arop ankwap fárakapan yopori kwapon. ²² Amo te koupour aropamp me korok yae papria ‘Kwaromp tére téreae’ ria séri kwapon. Ankwap aropamp kwatae ninikan panek yakria, amoku mwar yiki kor yae-párák kare yakampo.

²³ Amo te touwe sámp saráp yakria, waráp yare te kárakáre mo námpono. Ént mwar fári kwapon. Wain ént kánanke méntér fánapo, waráp touwe am fwap naenámpono.

²⁴ Ankwap fárakapamp kwatae nínik manénkir koupour érik korop nánko, nomo koupour nkeaka mér i konámp. Aeno ankwap fárakapamp kwatae nínik te mek yakea nánkár wakmwaek érik korop konámp. ²⁵ Taknámp nínik kwapwerao kor érik yakria maok, tá ankwap nínik kwapwerao kor tamak érik yak mo i konámp. Am tak námpao kor youpoukwap mek yak mo i konámp.

6

Kwaporok tére konap aropamp kar

¹ Kwaporok tére konap Kristen arop fárakap te nárap arop tokwaeran e tokwae sánkria maomp yae ancore mek yakáp mwanapon. Aenapo maok, am poukeyakápnap aropao kor Kwaromp e wouroump sér moria, nomo Kristen yakáp námpan kor wouroump sér mo mwanapon. *

² Kwaporok tére konap aropamp arop tokwaerao kor Kristen ara, máte mwearonoria kar

* ^{6:1:} Ta 2:9-10

ták-pwar mwanape. Arakrá níník kipo: ‘Mao te Kristenara, ono man warákárria maok, ono maompor tére fwapia térea yaewour nanampono’ riaka kwapwe kare tére kipo. ☩

‘Mani kikiank te ponankor kwatae ninik fi kor’rá sénámp kar

Amo ankár koumteouráp aropan má kwapwe kare ninikan yénkrá farákápria am ninikaok ‘Arak kip’rá sérampo. ³ Nomp Tokwae Kar Jisas Kraisomp kar kare te Kwaro i konámp níníkaok tukup mwanámp yae-párák farákáp konámp. Aeno arop ankwap am karan monoria pwarará ankwap aopwe kar farákáp nánko, ⁴ nomo te wae mérono, am arop te ono te níník kourráp arop tokwaenorá níník námpao maok, kwaporok mwar táman námp. Mao kikiank kwatae námp te, Kwaromp wakmwaek tukup konap yénk konap kar fek arop ankwapént kákkarrá kar yorowar námpan kikiank i konámp. Aenámp fek táman kokwarok níník, kar yorowarnámp níník, wouroump kar, ankapan onan kwekár námponorá kwatae níníknámp níník, am ou mek korop konámp. ☩ ⁵ Am fárákap ankár kákkar saráp yakáprá, kar yurukup mwanap épépérap kare yakáprá, kare kar karan mér mo karenono. Mao níníkrá, Kwarén mér napaok tukup námp te, am fek apárokamp ankank kápae kare ti mwanámpan mpwe níník i konapon. ☩

⁶ Táte kare, arop Kwaromp níníkaok akwapria te, tá méntér mao mokope ankank sámpá yak

✩ 6:2: Fm 1:16 ✩ 6:4: Ga 1:6-9; 2 Ti 1:13-14 ✩ 6:5: 2 Ti 4:3-4

námpañ fwaponorá warákár nánko te, am támao kápae kare ankankráp arop niamp i konámpono. ☩ 7 Nomo te wae mér námpón, éntupwaro nomwan fárakpnámp ke fek te, yaenémpi korop námpón. Tá taknámp nánkár wakmwaek mámá apár pwarará tukup námp fek kor, ankank sámpea tukup mono. 8 Aeno nomo fár mwanámp fir, tá pourou oupouroupnámp ankank sámpá yakáp námp te, nomo yonkwae porokwe fek 'Wae tamaono'rá sér mwaro. ☩ 9 Aeno arop ankank kápae kare ti naeria nínika waerá yárap námp te, kouao aopwe mek pik konámpnámp taknámp am kikiank nínik támao man sámp-fákeyak konámpono. Am épérépnámp kwatae pap konámp kikiank nínik te man oupouroupea apárok anámpea ankár souroumpour i konámpono. ☩ 10 Am mani kikiank tokwaenap nínik te, ponankor kwatae nínik fi kor tamaono. Arop ankwap fárakap te manian kikiank tokwae napo, am nínik támao am fárakapan éréképá akwap nánko, Kwarén mér nap pwate nánko, wakmwaek ono apae maoi naerá nínik tokwae mwarea napon. ☩

Timotin 'Kristenamp nínik kwapwe ponankor sámp fákeyakamp'rá sénámp kar

11 Aeno amo te Kwaromp aropara, amo am kikiank nínikan te ankár younkwe mwaek sírampo. Aeriaka amo te yae-párák kare nínik, Kwaro i konámp nínik, tá man mérnap nínikaok kárakáre fek yárapakapo. Aeria maok, aropan nouroupia, nkawakwe make ankank korop

✩ 6:6: Fl 4:11-12; Hi 13:5 ✩ 6:8: Snd 30:8 ✩ 6:9: Snd 28:22

✩ 6:10: Ef 5:5

námpón kor amo īnkírman námpritea kárákáre fek yakria maok, arop ponankor sánánkar porokwe fekampo. ¹² Arop Kraisén mér námp te, arop resis mek fárakop konámp niampono. Tak nánko maok, amo te am resis kwapwe mek kárákáre fek fárakopria maok, amo yiki yaká yak konámp sámp nanapon. Wokwaek amo kápae kare arop nkeap fek waráp Kraisén mér napan kárákáre fek fokopeyakea érik sénap ke fek maok, Kwaro amwan ‘Am yiki yaká yak sámpae’ ria wumwi rimpon. ¹³ Kwar ankank ponankor yiki yak nénk konámp, ntia Krais Jisas Pontius Pailatonámpok kárákáre fek fokopeyakea kare kar karan érik sérimp, Kwar ntia Krais Jisaso nke nep fek ono amwan tae fek sér rae: ☀ ¹⁴ Amo am sámpap karwaok ankár yae-párák kare téreampo. Arop amwan wouroump kar sénaeane. Amo te ankár takrá térerá akwapea, nomp Jisas Krais Tokwae Kar érik ék naenámp fekampo. ¹⁵ Kwaro Krais ék naenámp yae séri pwatenámp ke fek táman mao ék naenámpón. Am Kwar ankárrankampao saráp ankank ponankor poukeyak konámpara, nomo maomp e sámpea sakap mwaro. Mao te king fákáreramp King, tá arop tokwae fákárean poukeyak konámp Arop Tokwaeno. ☀ ¹⁶ Mao ankárrankamp támao saráp sumpwi mo i konámpon. Mao te wae tokwae fek yak námpara, nomo te maomp wonae fik tukup mo karenon. Wokwaek kar te arop ankárrank man te nke mo, táte arop man nke naenámp te pwi mo karenono. Aenapara, mao e tokwaeráp yakria, tá maomp kárákáre

☀ **6:13:** Jo 18:36-37; 19:11 ☀ **6:15:** Yé 17:14

ankár yaká yakano. Kare takano. ◊

Ankank kápae róamp kar

17 Apárokamp ankank kápae karenap aropan sérampo: Am fárakapao námo te arop tokwae namp ritea nkawake make ankank koupor toromore naenámp táman saráp mériaka tukup kwapon. Ankár Kwarén maok mér kare mwanapon. Kwar te nomo warákár mwanámp nompor kápae kare kwapwe kare ankank ti-sáp konámpono. ◊
18 Am fárakamp kwapwe kare ninik te ankank kápae kare niampria, kwapwe kare ninik fek yaewouranápono. Aeria maomp ankank kápae te monap arop fárakapan nénk saráp yakápanápono.
19 Am fárakapao takria te, nánkár wakmwaek man yaewour naenámp ankank koupor napara, mao fwap yiki yak sámp mwanap am te yiki yak karenono. ◊

Timoti ankár náráp tére fwapi taokeyak naenámp kar

20 Onomp Timoti e, Kwaro amwan sánknámp tére fwapia taokeyak kourampo. Aeria maok, Kwaromp ninikaok akwap mo, épérépnámp kar mwar te younkwe sánkampo. Tá am námoku kwekárrá ‘Ono te mér kare sámpá yak namp’rá sér i konap aropént te yak kwapon. Am fárakap te takria Kwaromp ninikan nkawake make kar yorowar i konapono. ◊ **21** Arop ankwap fárakap take pourouráp mér sámp namprá ninik nap te, Kwarén mérnap ninik wae pwate napon.

◊ **6:16:** Kis 33:20 ◊ **6:17:** Lu 12:20 ◊ **6:19:** Mt 6:20 ◊ **6:20:**

1 Ti 4:7; 2 Ti 1:14

Ono ninič namp te Kwar námoku yumwan
niničia yumwan yaewourano. [✡]

**Kwaromp Kwapwe Kare Kar
The New Testament in the Karkar-Yuri Language of
Papua New Guinea
Nupela Testamen long tokples Karkar-Yuri long
Niugini**

Copyright © Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 11 Nov 2022 from source files dated 9 Oct 2020

7103f8db-88c2-5fec-8ac4-0edfac04e885